

Bosna i Hercegovina
Federacija Bosne i Hercegovine
**SKUPŠTINA KANTONA
SARAJEVO**



Босна и Херцеговина
Федерација Босне и Херцеговине
**СКУПШТИНА КАНТОНА
САРАЈЕВО**

Bosnia and Herzegovina
Federation of Bosnia and Herzegovina

**CANTON SARAJEVO
ASSEMBLY**

Nezavisni odbor
Broj:01-04-556-43/21
Sarajevo, 28.09.2021. godine

SKUPŠTINA KANTONA SARAJEVO

O V D J E

PREDMET: Izvještaj o radu Nezavisnog odbora za period mart-septembar 2021. godine - dostavlja se

Nezavisni odbor na sjednici održanoj dana 28.09.2021. godine razmatrao je Izvještaj o radu Nezavisnog odbora za period mart-septembar 2021. godine, a u skladu s članom 34. st.4. Zakona o unutrašnjim poslovima Kantona Sarajevo ("Službene novine Kantona Sarajevo" br.:1/16, 26/19,31/19 i 39/20), isti dostavlja Skupštini Kantona Sarajevo, na razmatranje.

PREDSJEDNIK

Miroslav Kružik, s.r.



web: <http://skupstina.ks.gov.ba>
e-mail: skupstina@skupstina.ks.gov.ba
Tel: + 387 (0) 33 562-044,
Fax:+ 387 (0) 33 562-210
Sarajevo, Reisa Džemaludina Čauševića 1





IZVJEŠTAJ
o radu Nezavisnog odbora za period mart – septembar 2021. godine

Sarajevo, septembar 2021. godine



web: <http://skupstina.ks.gov.ba>
e-mail: skupstina@skupstina.ks.gov.ba
Tel: + 387 (0) 33 562-044, Fax: + 387 (0) 33 562-210
Sarajevo, Reisa Džemaludina Čauševića 1



Na osnovu člana 33. stav (1) tačka h) i člana 34. stav (4) Zakona o unutrašnjim poslovima Kantona Sarajevo („Službene novine Kantona Sarajevo“ br. 1/16, 26/19, 31/19 i 39/20) i članom 8. tačka 8) Poslovnika o radu Nezavisnog odbora ("Službene novine Kantona Sarajevo", br. 23/16, 39/19 i 48/20), Nezavisni odbor Skupštini Kantona Sarajevo, podnosi

IZVJEŠTAJ **o radu Nezavisnog odbora za period mart – septembar 2021. godine**

I- Uvod

Nezavisni odbor imenovan je Odlukom o imenovanju Nezavisnog odbora Skupštine Kantona Sarajevo broj:01-05-2513/18 od 31.01.2018. godine (u daljem tekstu Nezavisni odbor), a isti je u novom sazivu počeo sa radom 23.02.2018. godine.

U izvještajnom periodu Nezavisni odbor obavljao je poslove i zadatke u punom sazivu.

U Nezavisni odbor imenovano je sedam članova predstavnika iz reda građana.

Mandat članova Nezavisnog odbora traje 4 (četiri) godine.

Nezavisni odbor je u periodu mart - septembar 2021. godine obavljao poslove u skladu sa Zakonom o unutrašnjim poslovima Kantona Sarajevo, Zakonom o policijskim službenicima, Poslovnikom o radu Nezavisnog odbora, kao i drugim relevantnim zakonima i podzakonskim aktima.

U nadležnosti Nezavisnog odbora je da:

- (1) raspisuje i provodi Javni konkurs za imenovanje policijskog komesara;
- (2) vrši selekciju i predlaže listu kandidata za izbor policijskog komesara Vladi Kantona koju dostavlja posredstvom ministra;
- (3) prati rad policijskog komesara, nadzire primjenu ovlaštenja policijskog komesara u rukovođenju Upravom policije iz člana 23. Zakona o unutrašnjim poslovima i o tome izvještava Skupštinu Kantona Sarajevo;
- (4) ako procijeni za potrebnim može izvršiti neposredni uvid u akte i predmete Uprave policije u skladu sa članom 47. navedenog Zakona;
- (5) predlaže smjenu policijskog komesara Vladi Kantona u skladu sa Zakonom o unutrašnjim poslovima;
- (6) vodi prvostepeni disciplinski postupak protiv policijskog komesara i izriče disciplinske sankcije;
- (7) prima, razmatra i postupa po podnesenim žalbama na rad policijskog komesara;
- (8) usvaja Poslovnik o radu Nezavisnog odbora;
- (9) sačinjava izvještaje o radu Nezavisnog odbora svakih šest mjeseci i dostavlja ih Skupštini Kantona na razmatranje;
- (10) sačinjava detaljan tromjesečni izvještaj o radu policijskog komesara, koji dostavlja Skupštini Kantona;
- (11) po potrebi razmjenjuje informacije, podatke, dokumente po pojedinim predmetima sa Komisijom za sigurnost Skupštine Kantona Sarajevo;
- (12) obavlja druge poslove propisane Zakonom o unutrašnjim poslovima Kantona Sarajevo, Zakonom o policijskim službenicima Kantona Sarajevo i drugim propisima.

II–Normativni dio

Tokom izvještajnog perioda Nezavisni odbor je:

- *podnio Izvještaj o radu Nezavisnog odbora za period septembar 2020. godine - februar 2021. godine, koji je usvojen 07.04.2021. godine na 34. radnoj sjednici Skupštine Kantona Sarajevo;*
- *sačinio detaljne tromjesečne izvještaje o radu policijskog komesara za period: januar-mart 2021. godine i april-juni 2021. godine i uputio ih Skupštini Kantona Sarajevo.*

S obzirom da su detaljni tromjesečni izvještaji o radu policijskog komesara materijali informativnog karaktera isti nisu razmatrani na sjednici Skupštine Kantona Sarajevo.

U vršenju zadataka iz svoje nadležnosti Nezavisni odbor je donosio zaključke, sačinjavao odgovore, informacije, kao i druge akte iz svoje nadležnosti, te redovno obavještavao javnost o svom radu.

U izvještajnom periodu Nezavisni odbor je postupio po aktu Kantonalnog tužilaštva Kantona Sarajevo broj: T09 0 KTAK 0156057 20 od 25.05.2021. godine, te na osnovu istog dostavio detaljnu informaciju pod brojem 01-04-556-40/21 od 22.06.2021. godine (Informacija po anonimnoj prijavi podnešenoj protiv policijskog komesara, ministra unutrašnjih poslova Kantona Sarajevo za djela iz prethodnog mandata).

III - Tematski dio

Tokom izvještajnog perioda Nezavisni odbor je održao 6 redovnih sjednica.

Na tridesetsedmoj sjednici održanoj 23.03.2021. godine Nezavisni odbor je usvojio zapisnik o glasanju članova Nezavisnog odbora sa sjednice održane dana 17.02.2021. godine u vezi sa prijedlogom pismene godišnje ocjene rada policijskog komesara za 2020. godinu koji je usvojen jednoglasno.

Na sjednici zbog bolesti nije prisustvovao Policijski komesar.

Članovi Nezavisnog odbora su Izvještaj o radu Nezavisnog odbora za period septembar 2020. - februar 2021. godine usvojili jednoglasno i isti uputili u skupštinsku proceduru.

Član Nezavisnog odbora informirao je članove Nezavisnog odbora da je na njegovu kućnu adresu došlo pismo koje je anonimno ali se navodi da ga šalju zaposlenici Uprave policije. U pismu se traži da se provjeri kada policijski komesar Nusret Selimović teba da ide u penziju obzirom da isti raspolažu podacima da bi isti ispunjava uslove za odlazak u penziju u 2022. godini, a njegov mandat traje do 8. mjeseca 2023. godine. Članovi Nezavisnog odbora su se dogovorili da predmetno pismo isti donese na sljedeću sjednicu Nezavisnog odbora kada će Nezavisni odbor zauzeti stav po istom.

Na tridesetosmoj sjednici održanoj 20.04.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za februar i mart 2021. godine.

Obrazlažući informacije o aktivnostima Uprave policije za februar i mart 2021. godine, policijski komesar Nusret Selimović je istakao da je u mjesecu februaru 2021. godine, na području Kantona Sarajevo, prema evidencijama Uprave policije MUP-a Kantona Sarajevo, registrovano 395 događaja sa obilježjem krivičnog djela. Od ukupnog broja registrovanih događaja sa obilježjem krivičnog djela, 202 su evidentirana po poznatom izvršiocu, a 193 po nepoznatom izvršiocu. Za događaje sa obilježjem krivičnog djela, koji su evidentirani u mjesecu februaru 2021. godine, prema izjavama oštećenih lica, nastupila je materijalna šteta u ukupnom iznosu od 557.690,61 KM i 300 €. Na području Kantona Sarajevo u mjesecu februaru 2021. godine u odnosu na isti mjesec prethodne godine smanjen je ukupan broj saobraćajnih nezgoda, nezgoda sa materijalnom štetom i nastradalim licima i broj povrijeđenih lica, dok je broj poginulih lica povećan.

Prema podacima IOM-a na području Kantona Sarajevo u prihvatnim, azilantskim i imigracionim centrima boravi cca 4.028 migranata. U mjesecu februaru 2021. godine migranti su učestovali u osam događaja sa obilježjem krivičnog djela i to: Ubistvo u pokušaju – jedan, lahka tjelesna ozljeda – jedan, posjedovanje i omogućavanje uživanja opojnih droga – jedan, krađa – jedan itd.

Tokom mjeseca februara 2021. godine, službenici policije proveli su šest akcija, kontrolisali 298 migranata, od čega 122 nije posjedovalo registracijski obrazac, 11 je predato službi za poslove sa strancima radi registracije i 191 migrant je smješten u prihvatne centre na području Kantona Sarajevo.

U mjesecu martu 2021. godine na području Kantona Sarajevo, prema evidencijama Uprave policije MUP-a Kantona Sarajevo, registrovana su 402 događaja sa obilježjem krivičnog djela, što je 56 ili 16,2% više u odnosu na isti mjesec prethodne godine. Za događaje sa obilježjem krivičnog djela, koji su evidentirani u mjesecu martu 2021. godine, prema izjavama oštećenih lica, nastupila je materijalna šteta u ukupnom iznosu od 741.747,00 KM.

Član Nezavisnog odbora je postavio pitanje policijskom komesaru u vezi sa ubistvom našeg sugrađanina od strane migranata koji su kasnije pronađeni u susjednim zemljama, da li ima nekih novih činjenica ili saznanja u vezi sa istim. Policijski komesar je odgovorio da se za jednim počiniocem još uvijek traga i da je raspisana međunarodna potjernica. Za drugu dvojicu počinioca čeka se njihovo izručenje.

Isto tako član Nezavisnog odbora se osvrnuo i na tabelu Uprave policije o penzionisanju policijskih službenika koja je došla i do članova Nezavisnog odbora a u kojoj je navedeno da i on (policijski komesar) ispunjava uslove za odlazak u penziju 2022. godine te postavio pitanje kako je taj dokument „procurio“ iz Uprave policije prema vani. Što se tiče pomenute tabele, odnosno spiska policijskih službenika koji ove i sljedeće godine ispunjavaju uslove za odlazak u penziju, policijski komesar je istakao da ukoliko članove Nezavisnog odbora interesuje detaljan odgovor dostaviće ga pismenim putem ali ta tabela je preliminarni dokument u kojem se navodi ko bi mogao biti potencijalni kandidat za odlazak u penziju. Taj dokument će biti korigovan te je istakao da se trenutno vrši usklađivanje podataka o penzijskom stažu u MUP-u Kantona Sarajevo i u PIO/MIO F BiH, pa je zbog toga došlo do greške u tabeli u kojoj je navedeno da jedan broj policijskih službenika ostvaruje uslove za penzionisanje. Što se tiče njega samog (u ruci je držao dokument od PIO/MIO o radnom stažu) isti ne ispunjava uslove za penzionisanje. A dokument po njegovom mišljenju je „procurio“ kao i mnogi drugi dokumenti koji izlaze prema vani.

Član Nezavisnog odbora je istakao je da nema potrebe da policijski komesar povisuje ton ili da se ljuti jer je u pitanju tabela koja je dokument nadležnog odljeljenja Uprave policije i da uvijek postoji mogućnost da je neko pogriješio. Policijski komesar je odgovorio da ta tabela nema niti potpis niti pečat te kao takva nije zvaničan dokument Uprave policije. I on ima pravo na svoje mišljenje ili stav isto kao što članovi Nezavisnog odbora imaju pravo na svoj stav ili mišljenje.

Član Nezavisnog odbora je istakao da se tenzije trebaju smiriti te naglasio da je Nezavisni odbor skupštinsko tijelo koje nadzire rad policijskog komesara u skladu sa Zakonom o unutrašnjim poslovima Kantona Sarajevo sviđalo se to nekome ili ne.

Član Nezavisnog odbora je postavio pitanje policijskom komesaru šta je učinjeno poslije nemilih događaja u kampu u Blažuju gdje je nanesena veća materijalna šteta na motornim vozilima Uprave policije, te da li se uspjelo sa popravkom istih. Policijski komesar je istakao da je jedan manji dio motornih vozila popravljen i stavljen u funkciju dok su druga vozila na kojima je pričinjena totalna šteta kasko osigurana i ona se neće ni popravljati. Očekuje se isplata osiguranja od cca 60.000,00 KM.

Isto tako se dotakao i problema činovanja policajaca te raspisivanja konkursa za prijem novih policajaca. Policijski komesar je odgovorio da što se tiče činovanja i konkursa za prijem policajaca to još nije urađeno, jer nije donesen Pravilnik o sistematizaciji i organizaciji UP, a preduslov za njegovo donošenje je donošenje Uredbe koju treba da donese Vlada Kantona Sarajevo. U međuvremenu (od novembra 2020. godine) Skupština Kantona Sarajevo donijela je zaključak kojim je usvojen moratorij na zapošljavanje tako da nije bilo elemenata da se raspiše konkurs. Pokretanje procedure činovanja usko je vezano za Pravilnik. Policijski komesar je naglasio da očekuje da će se procedura pokrenuti sredinom godine.

Obzirom da je policijski komesar odgovarajući na ovo pitanje imao pripremljen odgovor u pismenoj formi koji je pročitao Nezavisnom odboru a koji je bio na skoro dvije stranice, članica Nezavisnog

odbora, zamolila je policijskog komesara da taj odgovor dostavi Nezavisnom odboru u pismenoj formi a koji će biti sastavni dio zapisnika sa 38. sjednice.

Član Nezavisnog odbor postavio je pitanje policijskom komesaru u vezi sa prekovremenim radom policijskih službenika u prethodnom mjesecu u smislu da li se donosi naredba o istom. Policijski komesar je odgovorio da donosi naredbu o prekovremenom radu.

Drugi član Nezavisnog odbora, se nadovezao te postavio pitanje policijskom komesaru da li se ta naredba o prekovremenom radu šalje svim organizacionim jedinicama.

Policijski komesar je odgovorio da je donio naredbu o prokovremenom radu zbog situacije sa migrantima, pandemije COVID-19, razbojništva itd. i ta naredba se dostavlja svim organizacionim jedinicama. U mjesecu martu policijski službenici su izvršili 243.000 kontrola lica koja su bili u izolaciji. Sve navedeno dovodi do povećanog obima poslova te se mora angažovati veći broj policijskih službenika.

Član Nezavisnog odbora je naglasio da to znači da načelnici policijskih uprava sačinjavaju pojedinačne planove na osnovu te naredbe o prekovremenom radu u zavisnosti od toga šta je prioritet na njihovom području djelovanja. Vjerovatno se radi o operativnim planovima. Također je postavio pitanje da li su načelnici odnosno komandiri policijskih stanica dostavili izvještaje o prekovremenim satima policijskih službenika. Policijski komesar je dodao da svaki sat prekovremenog rada mora biti obrazložen u izvještaju sa tačno navedenim zadacima na kojima su radili policijski službenici. Naglasio je da je bila poslana i vanredna inspekcija da se utvrdi opravdanost prekovremenih sati.

Članica Nezavisnog odbora, postavila je pitanje Komesaru koje se odnosilo na lica koja su zaposlena na osnovu ugovora o djelu u Upravi policije. Ista je istakla da se na zvaničnoj web stranici MUP-a Kantona Sarajevo objavljuju rješenja vezana za isplatu određenih naknada te između ostalog su objavljena rješenja o angažovanju lica po ugovoru od djelu. Iz istih je vidljivo da se određena lica angažuju svaki mjesec već tri godine obzirom da je ista za navedeni period pogledala ugovore i da to nije smisao ugovora o djelu. Ugovorom o djelu se angažuje osoba da završi određeni posao i da se isplati za isti. U ovom slučaju jedna te ista lica se angažuju svaki mjesec i primaju iznos u visini prosječne plaće u periodu od tri godine. Nekim angažovanim licima u opisu onoga što rade kao djelo se navode opisi poslova iz trenutnog Pravilnika o sistematizaciji radnih mjesta MUP-a Kantona Sarajevo. U tom smislu je skrenula pažnju policijskom komesaru da ukoliko postoji potreba a očigledno psotoji jer se angažuju ljudi po ugovoru o djelu da se ista sistematizuju u novom Pravilniku ili da se poveća broj izvršilaca. Policijski komesar je odgovorio da je trenutno na osnovu ugovora o djelu angažovano 8 lica i da Uprava policije ne može da ih zaposli zbog nedostaka slobodnih radnih mjesat u trenutnom Pravilniku o sistematizaciji, bez obzira što većina tih lica duže vrijeme rade u MUP-u Kantona Sarajevo.

Dalje se osvrnula i na dopis TV kuće HAYAT u kojem je Nzavisni odbor zamoljen da postavi pitanje policijskom komesaru koji su stvarni razlozi zbog kojih isti zabranjuje navedenoj medijskoj kući snimanje policijskih službenika prilikom provođenja određenih aktivnosti. Isti su u dopisu dostavili linkove na kojima se vidi da novinari avaza ulaze u službena motorna vozila i snimaju policijske službenike. Policijski komesar je odgovorio da zbog epidemiološke situacije Uprava policije ne dopušta ni jednoj tv i radio kući da se približavaju službenicima policije u smislu snimanja iz blizine te da isti mogu obavljati svoje radne zadatke na pristojnoj udaljenosti. Također je dodao da je upoznat sa slučajem da je nekim novinarima bez njegovog dopuštenja dozvoljeno snimanje iz blizine i da je protiv tih policijskih službenika pokrenut postupak kojeg vodi unutrašnja kontrola.

Nadalje je članica Nezavisnog odbora postavila pitanje da li ima određenih novih činjenica u vezi sa presudom policijskog službenika S.K. Policijski komesar je odgovorio da je Ustavni sud donio presudu kojom je usvojio podnesenu mjeru policijskih službenika a kasnije je donio presudu kojom ju je odbacio kao preuranjenu. Ti policijski službenici su išli u zaštitu svojih stečenih prava i Općinski sud je na njihov zahtjev donio privremenu mjeru osiguranja. Istakao je da se obraćao svim institucijama za pomoć u primjeni navedene presude. Trenutno je formirana Radna grupa, pet članova, tri predstavnika Uprave policije i dva Ministarstva unutrašnjih poslova sa zadatkom da analiziraju donesenu presudu i predlože rješenja policijskom komesaru.

Članica Nezavisnog odbora je postavila pitanje policijskom komesaru šta je Uprava policije odgovorila na podnesenu mjeru policijskih službenika jer pretpostavlja da se tražilo izjašnjenje Uprave policije. Policijski komesar je odgovorio pitanjem :“Šta je trebao odgovoriti?“. Članica Nezavisnog odbora je istakla da ona ne zna šta je on trebao odgovoriti ali želi da zna šta je odgovoreno ispred Uprave policije u tom aktu. Policijski komesar je odgovorio da je u aktu navedeno da se slažu sa podnesenom mjerom jer je smatrao da se time ne čini nikakva šteta niti vrijeđaju nečija prava.

Jedan od članova Nezavisnog odbora je dodao da on smatra da je u ovom slučaju policijski komesar stao na stranu zaštite počinjenih nezakonitosti koje se navode u presudi vezano za postupak činovanja policijskih službenika.

Član Nezavisnog odbora se nadovezao i postavio pitanje policijskom komesaru koje aktivnosti su poduzete prema policijskim službenicima koji nisu obuhvaćeni mjerom osiguranja. Misli se na dva policijska službenika koji nisu navedeni na spisku policijskih službenika koji su tražili mjeru osiguranja. Policijski komesar je odgovorio da je odluku vezanu za mjeru osiguranja dobio prije deset dana i da ne može odmah ići prema policijskim službenicima koji nisu dali punomoć za podnošenje mjere osiguranja. Istakao je da očekuje da određena rješenja dođu od članova formirane Radne grupe.

Jedan od članova Nezavisnog odbora je postavio pitanje policijskom komesaru da li će presuda blokirati daljnja činovanja u Upravi policije. Policijski komesar je odgovorio da će se otpočeti sa postupkom činovanja jer on ne može nikome zabraniti da se prijavi ako ispunjava uslove.

Članica Nezavisnog odbora postavila je pitanje policijskom komesaru šta se desilo sa saobraćajnom nesrećom u Buća potoku gdje je nepoznata žena, nepoznate marke vozila, nepoznate boje udarila biciklistu (dijete) i pobjegla sa mjesta događaja a što je pročitala na nekom od portala, da li je ustanovljeno ko je počinilac. Policijski komesar se neposredno konsultovao sa dežurnim operativcem u UP i rekao je da je počinilac otkriven i prema njemu će biti sprovedene sve zakonom propisane mjere.

Na tridesetdevetoj sjednici održanoj 17.05.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec april 2021. godine. Sjednici Nezavisnog odbora nije prisustvovao Nusret Selimović, (najavio odsustvo putem e-maila) policijski komesar, umjesto njega bio je prisutan M.Hasanović policijski službenik.

Policijski službenik Muhamed Hasanović je vrlo kratko obavjestio članove Nezavisnog odbora o aktivnostima Uprave policije Ministarstva unutrašnjih poslova Kantona Sarajevo za mjesec april 2021. godine, gdje je naveo da je došlo do povećanja KD iz oblasti imovinskih delikata što predstavlja veliki problem Upravi policije.

Članovi Nezavisnog odbora bez rasprave su primili k znanju ovu Informaciju.

Na sjednici je sačinjen detaljni Izvještaj o radu policijskog komesara za period januar-mart 2021. godine sa čijim tekstom su se u potpunosti složili svi članovi Nezavisnog odbora.

Član Nezavisnog odbora je izrazio nezadovoljstvo zbog neprisustva policijskog komesara sjednici kao i njegovim dostavljenim odgovorima na upite od strane Nezavisnog odbora.

Drugi član Nezavisnog odbora je istakao da Nezavisni odbor samo treba da se "vodi" zakonima i Poslovníkom o radu Nezavisnog odbora te ako se utvrdi neodgovornost komesara treba pokrenuti postupak, ali prije toga treba izvršiti analizu njegovog rada u predhodnom periodu.

Član Nezavisnog odbora se složio sa izjavama prethodnog člana Nezavisnog odbora te istakao da su članovi Nezavisnog odbora najviše krivi, jer su dopustili da se Policijski komesar tako ponaša, sve što se od njega traži, on vidi Nezavisni odbor kao svog neprijatelja.

Jedan od članova Nezavisnog odbora je iznio svoje mišljenje o radu Policijskog komesara govoreći da ima i pozitivnih i negativnih stvari, te da je već duže vrijeme ovako stanje. Nezavisni odbor ima jedinu mogućnost a to je ocjenjivanje komesara za njegov rad. Odbor treba analizirati cjelokupne rezultate rada Policijskog komesara i na kraju treba donijeti svoju odluku (ocjenu).

Članica Nezavisnog odbora je istakla da Policijski komesar u roku od 6 mjeseci od donošenja Zakona o policijskim službenicima nije donio Pravilnik o unutrašnjoj organizaciji i sistematizaciji radnih mjesta u Upravi policije. To je jedan veliki minus na njegov rad. Ona smatra da bi trebalo

pokrenuti disciplinski postupak protiv njega. Isto tako zbog opstrukcije od strane komesara predlagala je da Nezavisni odbor "ode" u sjedište MUP-a i traži sve odgovore koje je komesar po zakonu bio dužan da dostavi Nezavisnom odboru.

Na četrdesetoj sjednici održanoj 08.06.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec maj 2021. godine. Policijski komesar Nusret Selimović je obavjestio članove Nezavisnog odbora da Uprava policije još uvijek nije pripremila Informaciju o aktivnostima Uprave policije Ministarstva unutrašnjih poslova Kantona Sarajevo za mjesec maj 2021. godine, te će ista biti dostavljena Nezavisnom odboru u toku sljedeće sedmice. Naglasio je da je u mjesecu maju 2021. godine bilo nekoliko bitnih akcija vezano za krivična djela razbojništva i teške krađe.

Članovi Nezavisnog odbora su konstatovali da će se Informacija za o aktivnostima Uprave policije Ministarstva unutrašnjih poslova Kantona Sarajevo za mjesec maj i juni 2021. godine razmatrati na sljedećoj sjednici Nezavisnog odbora.

U vezi sa zahtjevom Kantonalnog tužilaštva u Sarajevu kojom se od Nezavisnog odbora tražilo dostava informacije u pogledu eventualnog postupanja Nezavisnog odbora nakon prijema podneska pod nazivom „žalbe na favoriziranje podobnih kolega“, od 28.04.2020. godine, te da li su pribavljeni podaci i dokumentacija od policijskog komesara radi utvrđivanja nepravilnosti iznesenih u tim prijavama, član Nezavisnog odbora, postavio je pitanje policijskom komesaru u vezi sa određenim činjenicama iznesenim u podnesenoj anonimnoj prijavi a odnosi se na navode da je dolaskom istog na poziciju policijskog komesara prekinut postupak napredovanja 150 policijskih službenika koji je pokrenut od strane bivšeg policijskog komesara Halilovića. Policijski komesar je odgovorio da to nije istina i da takav postupak (napredovanja) uopće nije bio pokrenut od strane bivšeg komesara.

Član Nezavisnog odbora postavio je pitanje policijskom komesaru vezano za postupak prijema novih policijskih službenika, u kojoj je fazi pomenuti postupak. Policijski komesar je odgovorio da je konkurs za prijem novih policijskih službenika objavljen, rok za prijavu je 30 dana i prima se 200 policijskih službenika. Istakao je da bi optimalno bilo da ne bude nikakvih vanrednih i neočekivanih okolnosti posebno sa aspekta epidemiološke situacije. Provest će se test općeg znanja a zbog očekivanog velikog broja kandidata, na prijedlog Komisije za izbor, isti se mogu obratiti Vladi Kantona Sarajevo da ista omogući (da saglasnost) provođenje daljnje procedure prijema policijskih službenika sa zdravstvenog aspekta. Svaka faza konkursa ima svoje rokove, za očekivati je i određen broj prigovora/žalbi te isti pretpostavlja da bi cjelokupna procedura prijema mogla biti okončana za sedam do osam mjeseci.

Član Nezavisnog odbora postavio je pitanje policijskom komesaru vezano za nedavne događaje paljevina motornih vozila u Kantonu Sarajevo, da li su pronađeni počinioci istih. Policijski komesar je odgovorio da u posljednje vrijeme nije bilo eskalacije u tom smislu i neki veći broj takvih događaja. Posebno je naglasio da je Uprava policije “preupredila” događaj likvidacije dvije osobe i osoba koja se sumnjiči za to je povezana sa podmetanjem eksplozivnih naprava na Otoci a u pozadini je trgovina narkoticima. Navedeno lice je i do sada nekoliko puta lišavano slobode ali se nije uspjelo doći do nalogodavca. Međutim stavljen je pod kontrolu, pronađena su dokazna sredstva i predmet je prosljeđen Tužilaštvu. Dodao je, kao što je po navedenom pitanju i ranije govorio, postavljanje eksplozivnih naprava i paljevine motornih vozila su veoma teške za dokazivanje, kao i pronalaženje počinitelja istih jer i same “žrtve” navedenih djela ne žele da sarađuju sa policijskim službenicima jer obično u pozadini stoje neki lični sukobi, neriješeni odnosi i sl.

Član Nezavisnog odbora postavio je pitanje policijskom komesaru vezano za navode u prijavi koje je na izješnjenje dostavljeno Nezavisnom odboru u vezi sa činjenicom da je jedan glavni inspector, koji je prije imenovanja Nusreta Selimovića na poziciju policijskog komesara obnašao istu, potpisao Ugovor o djelu sa svojom kćerkom. Policijski komesar je odgovorio da, koliko se sjeća, Federalna uprava policije po nalogu Tužilaštvo Kantona Sarajevo je dostavila ranije isti upit i da je odgovorio na njega, kao i da je predmet prosljeđio unutrašnjoj kontroli. Naglasio je da je kćerka od kolege i ranije bila angažovana u Upravi policije na osnovu ugovora o djelu te je o istom razgovarao sa njim i da je on rekao da u periodu kada je obavljao funkciju policijskog komesara

dobio je na potpis ugovore o djelu među kojima se nalazio i ugovor o djelu za njegovu kćerku i da je isti potpisao isto kao i ostale ugovore.

Član Nezavisnog odbora, postavio je pitanje policijskom komesaru vezano za navode u prijavi koje se odnose na isplatu prekovremenog rada odnosno kako se navodi “neosnovanog” dodatka na platu od 30% na rezultate rada. Policijski komesar je odgovorio da je dodjeljivanje dodatka na platu u iznosu od 30% na rezultate rada zakonski definisano i da je navedena odredba primjenjena te je policijskim službenicima zbog istih i dodjeljen dodatak na platu.

Član Nezavisnog odbora postavio je pitanje policijskom komesaru vezano za predmet Adnana Hadžagića koji je smrtno stradao, kako porodica prilikom gostovanja na N1 navodi, “bježeći od policije”, te da isti sumnjaju između ostalog da su istom nanijete teške tjelesne povrede od strane policijskih službenika. Policijski komesar je odgovorio da se zna ko vodi istragu, odnosno da nadležni tužilac vodi istragu. Na osnovu nekoliko prigovora unutrašnja kontrola je formirala predmet koji je prezentiran pred Odborom za žalbe i konstatovano je da nema elemenata za vođenje istrage. Dodao je da se radi o aktivnom predmetu i da u istom još uvijek nije donesena tužilačka odluka.

Članica Nezavisnog odbora postavila je pitanje policijskom komesaru vezano za ispunjavanje uslova za odlazak u penziju policijskog komesara, te je u tom smislu obavijestila istog da je Nezavisni odbor poslao upit Federalnom zavodu za penzijsko/mirovinsko osiguranje, Kantonalnoj administrativnoj službi Kantona Sarajevo. Navedena služba je odgovorila da je utvrđeno da na dan 15.05.2021. godine Nusret Selimović ima ukupno 35 godina, 08 mjeseci i 16 dana staža osiguranja. Međutim, u navedenom aktu je naglašeno da u pomenuti staž osiguranja nije uračunat period od 23.12.1991. godine do 31.01.1997. godine – Republički sekretarijat za unutrašnje poslove Sarajevo – nisu evidentirani podaci o plaći, uplata doprinosa (M4 obrazac). Također, u navedeni staž nije uračunat period od 01.01.1990. godine do 01.02.1991. godine jer se radi o poslodavcu Agropanonija Vršac, Poslovna jedinica Sarajevo, te je navedeno da bi bilo neophodno da Nusret Selimović podnese lični zahtjev kako bi se služba koja je dostavila odgovor Nezavisnom odboru mogla obratiti Republičkom fondu PIO Republike Srbije za dostavu M4 obrasca za navedeni period sa propratnim dokazima o uplaćenim doprinosima, a shodno odredbama Spazuma o socijalnom osiguranju između Bosne i Hercegovine i Republike Srbije. Također, u navedeni staž nije uračunata prijava osiguranja sa 01.10.1991. godine iz razloga jer nije evidentirana odjava sa osiguranja kod poslodavca sa registarskim brojem 1039011422 – SUR CAFFE BAR “LOTUS”, vl. Selimović Husret. U vezi sa naprijed navedenim, postavljeno je pitanje policijskom komesaru vezano za odgovor Uprave policije koji je ranije dostavljen Nezavisnom odboru a u kojem je navedeno da je za 1996. godinu Uprava policije dostavila M4 obrasce dok se u odgovoru nadležne službe Kantona Sarajevo navodi drugačije. Policijski komesar je odgovorio da je on dostavio zvaničan dokument o ukupnom random stažu koji je identičan dokumentu koji je priložio prilikom konkurisanja na poziciju policijskog komesara.

Članica Nezavisnog odbora je tražila od policijskog komesara da nadležna služba Uprave policije dostavi Nezavisnom odboru akt sa podacima koliko policijski komesar Nusret Selimović ima staža. Policijski komesar je dodao da je ranije napravljen dogovor sa Federalnim zavodom PIO da se povlače sredstva iz iznosa od 700.000 KM koji je ranije izdvojen u svrhu uplate doprinosa policijskih službenika i da se u tom smislu pokriju doprinosi za 1996. godinu obzirom da kada policijski službenik ide u penziju ta godina mu se računa kao uplaćena. Ngalasio je da je valjda Federalni zavod PIO jedina mjerodavna institucija koja treba da zna koliko on ima staža.

Na navedenoj sjednici Nezavisni odbor je pripremio Izvještaj o radu Nezavisnog odbora za period septembar 2020.god.-februar 2021. godine i isti je prosljedio na razmatranje Skupštini Kantona Sarajevo. Izvještaj o radu Nezavisnog odbora usvojen je od strane Skupštine Kantona Sarajevo.

Na sjednici je izvršen reizbor predsjednika Nezavisnog odbora i njegovog zamjenika koji će obavljati ove funkcije u periodu od narednih šest mjeseci, a što je predviđeno odredbama člana 9. Poslovnika o radu Nezavisnog odbora.

Na četrdesetprvoj sjednici održanoj 06.07.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec maj i juni 2021.

godine. Sjednici Nezavisnog odbora je prisustvovao glavni inspektor Muhamed Hasanović kao zamjena za policijskog komesara koji je na godišnjem odmoru.

Između tačaka dnevnog reda a do dolaska G-dina Hasanovića član Nezavisnog odbora je upoznao članove Nezavisnog odbora o njegovom prisustvu na sjednici Komisije za sigurnost, kao i članice Nezavisnog odbora, koja je održana u 10:00 sati tog dana. Isti su obavijestili ostale članove Nezavisnog odbora da se na sjednici Komisije za sigurnost razgovaralo o prijemu policijskih službenika, problemu „nečinovanja“ policijskih službenika, penzionisanju, kao i provođenju presude Općinskog suda u Sarajevu po žalbi policijskog službenika S.K. Posebno se postavilo pitanje provođenja presude zbog saznanja da postoje dva policijska službenika koji nisu podnijeli zahtjev za privremenu mjeru osiguranja te se prema njima presuda trebala primijeniti. Zbog naprijed navedenih razloga, Komisija za sigurnost je tražila od Nezavisnog odbora dostavljanje informacije u vezi sa podacima i činjenicama kojima raspolaže Nezavisni odbor a odnosi se na naprijed navedenu problematiku.

Glavni inspektor Muhamed Hasanović je u svom kratkom izlaganju istakao da je u mjesecu maju došlo do blagog povećanja kriminaliteta i to imovinskih krivičnih djela (razbojništvo, teška krađa i sl.). U ovom periodu policijski službenici MUP-a Kantona Sarajevo su bili usmjereni na nadzor nad poštivanjem epidemioloških mjera, te je utvrđeno da veliki broj stanovništva se ne pridržava ovih mjera, posebno u zatvorenom prostoru.

Što se tiče mjeseca juna došlo je do blagog smanjenja krivičnih djela, međutim bilježe se tri smrtna slučaja u saobraćajnim nezgodama.

U diskusiji koja je uslijedila članica Nezavisnog odbora je postavila pitanje G-dinu Hasanoviću koje se odnosilo na izazove policije u ovom periodu. G-din Hasanović je odgovorio da je to kriminalitet i migranti, s tim da se broj migranata u Kantonu Sarajevo u ovom periodu prepolovio. Međutim i pored toga dolazi često do međusobnog sukoba migranata, pa čak i sa smrtnim ishodom. Veliki problem predstavljaju ilegalni iznajmljivači stambenih objekata migrantima koji dnevno zarađuju velike sume novca a da pri tome ne prijavljuju izdavanje niti plaćaju porez državi.

Član Nezavisnog odbora postavio je pitanje G-dinu Hasanoviću da li je bilo pozitivnih pomaka u borbi protiv kriminala u ovom periodu, posebno sa aspekta krađe vozila, razbojništava i teških krađa. G-din Hasanović je odgovorio da je Uprava policije MUP-a Kantona Sarajevo imala oko 15tak aktivnosti sa MUP-om FBiH te je uhapsila veći broj kriminalaca (15) koji su predati tužilaštvu na dalje postupanje.

Član Nezavisnog odbora je postavio pitanje vezano za prevenciju kriminaliteta, posebno razbojništva, koji objekti su na meti kriminalaca, zbog čega nije urađeno činovanje policijskih službenika u protekle dvije godine, koji su razlozi za to, kada će to biti urađeno, posebno sa aspekta jer je dosta policijskih službenika postavljeno za vršioce dužnosti, koji su kriteriji bili za to, te da li se održavaju redovni kolegiji. G-din Hasanović je odgovorio da Uprave policije, posebno II i III koje su na udaru sa aspekta razbojništva su imale nekoliko aktivnosti u kojima su sudjelovali i policijski službenici iz drugih policijskih uprava u uniformama a oni u civilu te su bile ciljane akcije još od Nove godine ali se postavlja pitanje koliko su te aktivnosti uspješne odnosno koliko daju rezultate. Naravno da imaju uticaja ali da li u mjeri u kojoj Uprava policije to želi je pitanje. Svjedoci smo da su mete kriminalcima najčešće objekti maloprodaje (Konzum, Mercator, apoteke, benzinske pumpe i sl.) te policija u većini slučajeva uspije da pronađe i privede pravdi počinioce tih krivičnih djela.

Što se tiče činovanja u Upravi policije, prema njegovim saznanjima, čekale su se izmjene Zakona o policijskim službenicima da bi se pristupilo činovanju. Napomenuo je da u zadnje dvije godine nije bilo činovanja policijskih službenika. Jedino što je urađeno je da je određeni broj policijskih službenika postavljen na nova mjesta kao vršioци dužnosti i morali su ispunjavati uslove vezano za stručnu spremu i čin. Koliko je on upoznat kolegiji u Upravi policije sa načelnicima policijskih uprava se ne održava ali se održava sa načelnicima sektora.

Članica Nezavisnog odbora je istakla da je u prošlom mjesecu smanjen broj razbojništava te se u tom smislu osvrnula na izjavu koju je s tim u vezi dao ministar MUP-a Kantona Sarajevo G-din Katica u kojoj navodi (između ostalog) da je MUP uhapsio 15 "kapitalaca", te je postavila pitanje ko su to „kapitalci“. G-din Hasanović je odgovorio da su te izjave političke i da Uprava policije

nikada nije izašla sa takvom konstatacijom. Radi se o povratnicima u vršenju tih krivičnih djela (razbojništvo, razbojničke krađe).

Član Nezavisnog odbora postavio je pitanje G-dinu Hasanoviću koliko trenutno ima glavnih inspektora u Upravi policije koji ispunjavaju uslove za mjesto policijskog komesara. G-din Hasanović je odgovorio da, koliko je njemu poznato, samo jedan policijski službenik ispunjava uslove za mjesto policijskog komesara i to on.

Članica Nezavisnog odbora se osvrnula na objavljeni konkurs za prijem policijskih službenika te je u tom smislu postavila pitanje G-dinu Hasanoviću, da li mu je poznato koliko je već zaprimljeno prijava na navedeni konkurs. G-din Hasanović je odgovorio da se za 200 pozicija prijavilo preko 1500 kandidata (do danas pristiglo 1550 prijava).

Član Nezavisnog odbora se osvrnuo na ljekarske preglede policijskih službenika te istakao da se prema njegovim saznanjima isti nisu radili duži vremenski period. U tom smislu je postavio pitanje G-dinu Hasanoviću da li se planira i kada ljekarski pregled policijskih službenika. G-din Hasanović je odgovorio da je najbolje zatražiti odgovor pismenim putem, ali prema njegovim saznanjima, zadnji sistematski pregled policijskih službenika izvršen je davne 2010. godine i da zbog finansijskih problema nije više obavljen.

Član Nezavisnog odbora postavio je pitanje G-dinu Hasanoviću u vezi nabavke "vodenog topa", šta se desilo sa navedenom nabavkom. G-din Hasanović je odgovorio da je tender za tu javnu nabavku završen još prošle godine, međutim isti je poništen i sada je sva dokumentacija na sudskom odlučivanju po žalbi firme „KM Trade“.

Na četrdesetdrugoj sjednici održanoj 24.08.2021. godine Nezavisni odbor je primio k znanju Informaciju o aktivnostima Uprave policije MUP-a Kantona Sarajevo za mjesec juli 2021. godine. Sjednici nije prisustvovao policijski komesar zbog bolovanja, sjednici je prisustvovao g. Muhamed hasanović, glavni inspektor Uprave policije.

Nezavisni odbor je sačinio detaljni Izvještaj o radu policijskog komesara Uprave policije Ministarstva unutrašnjih poslova Kantona Sarajevo za vremenski period april – juni 2021. godine, te je isti prosljeđen Skupštini Kantona Sarajevo.

Glavni inspektor Muhamed Hasanović je u svom kratkom izlaganju istakao da je u mjesecu julu stanje u Kantonu Sarajevo sa tačke sigurnosti nešto bolje u odnosu na uporedni mjesec prošle godine. U ovom periodu dominiraju krivična djela protiv imovine, u oblasti saobraćaja bilježi se porast stradalih lica.

Stanje sa migrantskom populacijom je pod kontrolom. Smatra se da se trenutno u Kantonu Sarajevo nalazi oko 2000 migranata.

Otvarajući raspravu članica Nezavisnog odbora postavila je pitanja u vezi konkursne procedure oko zapošljavanja pripadnika MUP-a, da li je sve prošlo u redu prilikom održavanja gay parade i o procesu vakcinacije u redovima policije.

Gosp. Hasanović je rekao da se konkursna procedura sprovodi po unaprijed utvrđenim principima, da je u toku žalbeni postupak koga sprovodi Policijski odbor.

Što se tiče gay parade zabilježena je jedna upotreba sile a ostalo je sve prošlo u okviru zakonskih propisa.

Uprava policije MUP-a Kantona Sarajevo sprovodi mjere i akcije zaštite svojih uposlenika, tako da je veliki broj policijskih službenika vakcinisan.

Član Nezavisnog odbora se osvrnuo na raniju eskalaciju migrantske krize u toku zimskog perioda kada je u Kantonu Sarajevo bilo puno migranata, međutim otvaranjem rute preko Rumunije broj migrantske populacije se prepolovio. Postavio je pitanje da li su zbog smanjenog obima aktivnosti koje policijski službenici imaju sa migrantima policijski službenici Uprave policije svoj djelokrug rada preusmjerila prema drugim aktivnostima.

G-din Hasanović je odgovorio da je došlo do povećanog broja krađa motornih vozila te da Uprava policije preduzima određene korake kako bi spriječili iste, odnosno fokusirana je na preventivni rad. Također je dodao da se obavljaju određene aktivnosti na prevenciji krivičnog djela razbojništva.

Policijski službenici konstantno obavljaju aktivnosti i rade/nadziru grupe za koje se sumnja da vrše teška krivična djela krađe.

Član Nezavisnog odbora, G-din Samir Čorbo je postavio pitanje G-dinu Hasanoviću da li su ove krađe motornih vozila povezane sa kriminalnim grupama iz entiteta RS?

G-din Hasanović je odgovorio, da po njihovim saznanjima, krađa motornih vozila je povezana sa kriminalnim grupama iz Republike Srpske.

IV- Ocjena stanja i postignutih rezultata

Tokom izvještajnog perioda Nezavisni odbor je realizirao planirane programske aktivnosti koliko je istom bilo dopušteno od strane policijskog komesara čiji bi rad Nezavisni odbor trebao da nadzire. Naime u izvještajnom periodu od ukupno šest sjednica, policijski komesar nije prisustvovao na četiri sjednice.

Odredbama člana 24. stav 1. Zakona o unutrašnjim poslovima utvrđeno je da u slučaju privremene spriječenosti policijskog komesara (godišnji odmor, bolovanje, službena odsustva i slično) zamjenu policijskog komesara vrši policijski službenik zaposlen u Upravi policije koji ispunjava uslove za policijskog komesara.

Nezavisni odbor smatra da primjena navedenih odredbi nikako ne bi trebala biti pravilo, nego izuzetak.

Na sjednicama Nezavisnog odbora prisustvuje glavni inspektor Hasanović Muhamed, koga za to ovlasti policijski komesar.

Nezavisni odbor ne može postavljati pitanja iz nadležnosti policijskog komesara osobi koja to nije, te shodno tome ostaje uskraćena za niz odgovora.

Ukoliko Nezavisni odbor od policijskog komesara zatraži pisane informacije o pitanjima iz nadležnosti policijskog komesara istom se dostavljaju štire i nepotpune informacije od strane pojedinih službi Uprave policije.

Pojedini članovi Nezavisnog odbora bi tražili detaljnije pojašnjenje istih od policijskog komesara, ali kako on ne prisustvuje sjednicama, Nezavisni odbor ostaje uskraćen za iste.

Posebno naglašavamo da policijski komesar otkazuje svoje prisustvo na dan održavanja sjednice Nezavisnog odbora, dan prije održavanja iste ...,te na taj način dovodi predsjednika Nezavisnog odbora pred svršen čin, iako isti u skladu sa odredbama člana 45.stav (3) Zakona o unutrašnjim poslovima ima mogućnost sjednicu odložiti ili donijeti odluku da će se ista održati bez prisustva policijskog komesara.

Nezavisni odbor stiče dojam da policijski komesar izbjegavanjem direktnog kontakta sa članovima Nezavisnog odbora, pokušava obezvrijediti njegovu ulogu, kao i onemogućiti istom da postupi po Zakonu i prati njegov rad u pojedinim segmentima koji su decidno navedeni u odredbama člana 23. Zakona o unutrašnjim poslovima.

U izvještajnom periodu Nezavisni odbor je djelovao isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrirane organizacije ili udruženja ili bilo kojeg naroda ili pojedinca.

Nezavisni odbor je o svom radu redovno obavještavao javnost, putem web-portala i sredstava javnog informisanja, te je u cijelosti ispoštovan princip javnosti.

V- Kadrovska i materijalna osposobljenost

U periodu od marta 2021. godine – septembra 2021. godine, Nezavisni odbor je obavljao poslove i zadatke iz nadležnosti Nezavisnog odbora u punom sazivu.

Sjednice Nezavisnog odbora održavane su u obezbjeđenoj sali Skupštine Kantona Sarajevo.

Napominjemo da su u izvještajnom periodu sve sjednice Nezavisnog odbora održane u sali uz poštivanje preporučenih bezbjednosnih mjera, te da je Nezavisni odbor uspio i pored svih teškoća održavati redovne mjesečne sjednice.

Administrativno-tehničke poslove Nezavisnog odbora obavljao je sekretar, koji je uposlenik Stručne službe za skupštinske poslove, a isti je zadužen za čuvanje kompletne arhive Nezavisnog odbora.

VI - Programska orijentacija za naredni period

U narednom vremenskom periodu Nezavisni odbor će kontinuirano obavljati poslove utvrđene Zakonom o unutrašnjim poslovima Kantona Sarajevo, Zakonom o policijskim službenicima i Poslovníkom o radu Nezavisnog odbora, te ostalim pozitivnim propisima sa osnovnim ciljem postizanja još većeg stepena demokratizacije u radu policije, zaštite ljudskih prava i sloboda građana koji žive ili borave na području Kantona Sarajevo, te postizanja što većeg nivoa sigurnosti građana Kantona Sarajevo.

Nezavisni odbor predlaže Skupštini Kantona Sarajevo da usvoji Izvještaj o radu Nezavisnog odbora za period mart – septembar 2021.godine.

Predsjednik Nezavisnog odbora

Miroslav Kružik